

Date – 26/08/2025

Time - 07:30 -07:40Hrs

AKASHVANI AIZAWL

## REGIONAL NEWS BULLETIN

### HEADLINES (MORNING)

1. Mizoram Sawrkarin Ruihhlo Do Beihpui a thlak turah Mizoram Police IGP, Pu H. Ramthlenglina hovin Central YMA hruaituten Myanmar ramri khua te tlawhin an thang mek.
2. Ramchhunga state hrang hrang Goods and Services Tax dinhmun tarlanah Mizoram GST chu thla 4 chhung a zawnin a tlahniam.
3. Prime Minister Narendra Modia chuan nimin khan Ahmedabad atangin Gujarat-a hmasawna project hrang hrang cheng vaibelchhe 5400 hu a hawng.
4. Prime Minister Modia chuan Fiji leh India ten ralthuam leh venhimna lama an thawhdunna tihchangtlun an tum a ti.

<><><>

### SPECIAL DRIVE ON DRUGS

Mizoram Sawrkarin Ruihhlo Do Beihpui (Special Drive on Drugs) a thlak turah Mizoram Police IGP, Pu H. Ramthlenglina hovin Central YMA hruaituten Myanmar ramri khua te tlawhin an thang mek.

Nimin khan Tlangsam khawtlang hruaitute nen Tlangsam YMA Hall-ah hun an hmang a. Zote Community Hall-ah Zote, Ngur leh Ngur Vengsang khawtlang hruaitute nen inkawm leh in, tlai lamah Zote bul, Tiau lui kama Bulfek, Myanmar khawtlang hruaitute nen an inkawm leh bawk a ni.

Wawiin hian Hnahlan, N.Diltlang, Khuangphah leh Vaikhawtlang tlawhin khawtlang hruaitute an kawm leh ang.

Tiau lui atanga Mizorama Ruihhlo (drugs) a lo luhna kâi khân awmna khua zawng zawngte fang chhuak a, khawtlang hruaitute nena inkawm hona hun hmang tura kal an ni, Sesih, Lianpui, Leisenzo, Vangchhia, Vaphai, Saikhumphai leh Farkawn khua te fang zelin tunkar hun chhung hian hun an hmang anga, Zirtawpni khian Champhai ah Khawtlang hruaitute leh tlawmngai pawl hruaitute nen ruihhlo do ho dan tur an sawiho leh dawn a ni.

Mizoram Sawrkar ruahman dan chuan ramri hrul khaw tinah hian Police in-dahin September ni 1in Ruihhlo lo lut tur lakah beihpui thlak hi kalpui tur a ni dawn a ni.

IGP, Pu H.Ramthlenglina hova ramri tlawhchhuah programme hi Addl. SP Champhai Pu Victor Zothansanga leh a thawhpui ten an lo tawiawm a. Central YMA atangin Asst. Secretary Pu Fabian Lalfakawma, Treasurer Roneithanga leh Finance Secretary Pu MS Ralte te bakah CEC mi 3 leh Champhai Sub. Hqrs. YMA hruaitute an tel a ni.

Puan tawh angin Home Minister Pu. K.Sapdanga'n thla thar, September ni 1 atangin khawlai him leh muanawm zawk siam turin Mizoram Police ten beihpui an thlak dawn tih a lo sawi tawh a. Ramri kil tin atanga ruihhlo lo luhna te zirchian mek a ni tih sawiin, Mizoram Police hotuten a hmunah an luhchilh dawn a, Excise Force te leh tlawmngai pawlte nen tangrualin ruihhlo do beihpui thlak tum a ni a ti.

Home Minister chuan Mizoram chu ruihhlo leh ngawlveina laka chhanhim turin theihtawp chhuah tum a ni tih sawiin a bultan hautak hle dawn mahse Police officer te leh tlawmngai pawlte zarah beiseina sang tak an nei tih a sawi a ni.

Pu K sapdanga chuan, Mizoram chu ruihhlo in a chiah hneh hle a, ruihhlo ngawlvei tam tak zalen taka khawlaia leng thin te chuan mipuite zalenna a nekchep a, zanah chuan hmeichhia chu sawi loh mipa pawh lenpui nei lovin khawlaiah vah mai mai ngam a ni tawh lo a ti a. Ruihhlo ti mite avanga mipui nun chep phah chu a thlen an phal reng tur a ni lo tih sawiin, September ni 1 atang chuan khawlai him leh muanawm zawk siam turin beihpui thlak tumin Mizoram Police hotuten ruahmanna an siam tih a sawi a ni.

<><><>

CM

Chief Minister Pu Lalduhoma kaihhruaiin Chief Minister's Rubber Mission meeting nimin khan CM Conference Hall-ah neih a ni a,

Meeting-ah hian CM Rubber Missions, thawh hnihna kalpui dan tur tlangpui an sawi a. Ram hectare khata zauva Rubber kung 450 vel phun hi chhungkaw pakhat tan a beitham deuh dawna a lan avangin hectare hniha zau thlenga an tihzauh theih tur ram pek dan awm thei se. Tanpuina hi chu hectare khat atan pek phawt a, a tul anga a kumleh lama a pek belh dan dap thin ni se, an ti. Rubber tiak tha chauh loneituten an dawn theih nana hmalak dan tur tha nia an hriatte an sawi a. A chingtu turten a chi tha, chintlak nia an hriat chauh an lei theih dan ruahmanna siam ni se, an ti.

Chief Minister Rubber Mission hi NABARD fund leh Handholding sum hmanga kalpui mek a ni a. A thawh hnihna atan inbuatsaih chhoh mek niin a thawh hnihnaah hian Handholding atangin chhungkaw 1373 leh NABARD atangin chhungkaw 1200 te nena thawhho tur a ni.

<><><>

GST

Ramchhunga state hrang hrang Goods and Services Tax dinhmun tarlanah Mizoram GST chu thla 4 chhung a zawnin a tlahniam a, Hmarchhak State dangte chhiah khawn tla hniam awm ve bawk mahse Mizoram tlak hniam dan anga hniam a awm lo a ni.

Kumin Financial year 2025-26 thla 4 chhunga Mizoram GST khawnin nikum 2024-25 thlà thum chhung khawn a phak lohna April ah (-) 28% a ni a,

May ah (-) 26% niin June ah (-) 29% leh July ah (-) 21% in a phak lo a, State dangte nen khaikhinin Mizoram GST chhiah khawn hi a hniam hle a ni.

Ramchhunga state hrang hrang Goods and Services Tax dinhmun tarlanah Mizoram GST chu nikum 2024 July thla chhunga khawn aiin za zela - 21% in a tla hniam a, nikum July thlaa GST khawn hi cheng vbch 8 zetin a phak lo a ni.

*Ministry of Finance tarlan danin India ram chhiah khawnna atan July 2017 atangin GST hman anih hnuah rampum huapa GST khawn chu a pun belh zel a, nikum 2024 July thlaa GST nena khaikhinin a punna chu za zela 7.5 % a ni a, Thla 4 chhung (April leh July inkar) chhunga India ram GST khawn zat hi cheng vbch nuai 10.7 a tling tawh a, nikum hetiang hun chhunga khawn zat cheng vbch nuai 8.18 a ni.*

*Ministry of Finance tarlan danin nikum July 2024 thla GST chhiah khawn zat kumin July 2025-a khawn tling lo state 9 an awm a, nikum khawn zat phak lo nasa zualah Manipur minus 36% leh Mizoram (minus 21%) chu langsar zual a ni.*

<><><>

NTUM

National Trade Union Of Mizoram chuan Works Department pathum PWD, PHE & P&E a Muster Roll a awm mekte Provisional Employees (PE) a hlan kai an nih theihna atan Minister pathum an hmu.

NTUM hruaitute chuan thuchhuah siamin Chief Minsiter thurawn angin P&E Minister Pu F. Rodingliana, PWD Minister Pu Vanlalhlana leh PHE Minister Professor Lalnilawma-te chu PWD, PHE & P&E a MR-a thawk mekte PE-a hlan kai an nih theihna tur atan an hmu tih an tarlang a, an lo dawnsawn danah an lawm thu an tarlang bawk.

An department chan theuha Proposal siam tura NTUM-in an ngen angin Commissioner Secretary hnen-ah ziakin department theuhte September 2025 chhunga proposal siam a, Department of Personnel & Administrative Reforms a theh lut tura an ngennaah hma an laksak avangin lawm thu an sawi a, a hlawhtlin ngei theih nan beiseina sang tak nen an thlir reng dawn tih an tarlang a ni.

<><><>

NATIONAL EYE DONATION FORTNIGHT

Mizoram Mit pe tura intiam mi 9231 awm tawhin mit thlak ngai in ziaklut mi 391 an awm tawh a, kuminah mi 32 in an mit an pe tawh a ni.

National Eye Donation Forthnight Programme nimina Aizawl hmanaah mit thlak sak tawh mi 593 an awm thu tarlan a ni a, heng te hi Civil Hospital, Aizawl, Sri Sankaradeva Nethralaya, Guwahati, Eye Care Hospital, Aizawl leh Synod Hospital-ah te tih a nih thu an sawi a ni.

National Eye Donation Forthnight Programme vawi 40-na ah hian Dr. Lily Chhakchhuak chuan midangten khua an hmuh theihna tura thih hma emaw thih hnu emaw a Mit donate uar sauh sauh turin mipuite a chah a. Mit pek chungchanga hriattur pawimawh hrang hrang te sawiin mi tupawhin Mit a

pek theih a, mi a thih atanga Darkar 6 chhunga lak tur a nih thu leh Mit pe tura in register tawh ten chhungte hnena hrilhhriat a tul thu te, Mit pe duh emaw, pek ngai in register duh te tan biak theih reng an nih thu a sawi a, India ram state zawng zawng Eye Donation lam endikna-ah a ti tha zual 15 zingah Mizoram chu kan tel ve thu sawiin thawktu zawng zawng te thawhrimna-ah lawmthu a sawi bawk.

National Eye Donation Forthnight hi kum tin August ni 25 atanga September ni 8 inkarah hman thin a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM IN GUJARAT

Prime Minister Narendra Modia chuan nimin khan Ahmedabad atangin Gujarat-a hmasawna project hrang hrang cheng vaibelchhe 5400 hu a hawng. Thusawiin PM Modia chuan loneitute, ranvulhtute leh sumdawng tenau zawkte hamthatna zawn chu sawrkar ngaihpawimawh em em a ni a ti a. India chuan heng mite chungah harsatna thlen tir hi a duh lo tih a sawi a. Nun zahawm tak an neih theih nan sawrkar chuan an tan hna a thawk reng tih a sawi a. Khawpuia cheng mi retheite khawsak phung tih awlsam chu a sawrkar chuan a tum ber a ni a ti bawk.

<><><>

INDIA & FIJI

Prime Minister Modia chuan Fiji leh India ten ralthuam leh venhimna lama an thawhdunna tihchangtlun an tum a ti. Nimina Fiji Prime Minister Sitiveni Ligamamada Rabuka nen an inkawm hnua thuchhuah a siamah he thu hi sawiin an tawhdunna turah hian ruahmanna pawh an neih tawh thu a sawi a. Pu Modia chuan Sik leh sa inthlak chu Fiji tan a pawl thei tih sawiin ram pahnihten energy thianghlim hman kawngah thawhdun an tum tih a sawi bawk a. India leh Fiji chu International Solar Alliance, Coalition for Disaster Resilient Infrastructure leh Global Biofuels Alliance an tel ve ve tih a sawi bawk a ni.

India leh Fiji hian nimin khan thawhdunna tur inremna thuthlung chi sarih an ziaak a. India tlawha lo zin Fiji PM Rabuka leh Prime Minister Narendra Modia te New Delhi-a an inbiak hnua heng thawhdunna tur inremnate hi ziah a ni a. Thuthlung ziah zingah hian Health lamn tihchangtlunna tur a tel a. Prime Minister Narendra Modia chuan Fiji khawpui Suva-ah khum 100 awmna Speciality Hospital din a ni dawn tih a sawi a. Hei bakah hian ram pahnihte hian cybersecurity leh data venhimah thawhdun an remti a, firfiakte do kawngah tandun an rel bawk a ni.